

ՆԱՅԱԳԻՏԱԿԱՆ

ՎՐԵԺ ՎԱՐԴԱՆՅԱՆ

Պատմական գիտ. դոկտոր, պրոֆեսոր

ԱՐԻՍՏԱԿԵՍ ԵՎ ՎՐԹԱՆԵՍ ԿԱԹՈՂԻԿՈՍՆԵՐԸ ՆԵԹԱՆՈՍՈՒԹՅԱՆ ԴԵՄ ՊԱՅՔԱՐԻ ԿԵՌՄԱՆՆԵՐՈՒՄ

Տրդատ Մեծի և Գրիգոր Լուսավորչի արգասավոր գործունեության ընթացքում Հայաստանը ոտք դրեց քրիստոնեական քաղաքակրթության շրջափուլ: Հայ Առաքելական Եկեղեցին լուսավորեց երկրի բոլոր հորիզոնները՝ ժողովրդական ոգին և աշխարհագրացողությունը տոգորելով միասնական գիտակցությամբ: Հայաստանը շարունակեց հաղորդակցվել քրիստոնեացված հունա-հռոմեական աշխարհի գիտության և մշակույթի հետ: Սակայն դեռևս լիովին չհաղթահարվեց դիցական ժամանակների ոգին ու կենսակերպը: Այն իրեն զգալ էր տալիս հատկապես Տրդատ Մեծի և Գրիգոր Լուսավորչի մահվանից հետո:

Ամբողջ 4-րդ դարի ընթացքում շարունակվեց քրիստոնեության և հեթանոսության միջև ընթացող պայքարը, որը, չնայած Հայոց Եկեղեցու ներդրած ջանքերին, չգտավ իր վերջնական հանգուցալուծումը: Հայ նախարարների զգալի մասը կառչած էր մնում հնօրյա հավատքին, որին հաճախ զոհաբերվում էին երկրի քաղաքական շահերը: Հեթանոսական հավատն իր կենսունակությունը պահպանեց նաև ժողովրդի ընդերքում: Տրդատ Մեծին հաջորդած Հայոց թագավորները հեթանոսության դեմ մղվող պայքարում ոչ միշտ էին զորավիգում Եկեղեցուն: Նրանց վերաբերմունքը պայմանավորված էր հեթանոսական Պարսկաստանի հարևանությամբ, Սասանյան արքաների կողմից հեթանոսամետ հայ նախարարների հանդեպ ունեցած դրական դիրքավորմամբ,

որը երկրում ծնում էր տարամերժ միտումներ՝ պարարտ հող ստեղծելով քաղաքական հակոտնյա հոսանքների առաջացման համար:

Երկրի քաղաքական, հոգևոր կեցությանը համակած բացասամետ երևույթներին հակազդող գործոնը Եկեղեցին էր: Ուստի հեթանոսության դեմ արդյունավետ պայքար կազմակերպելու համար առաջին հերթին անհրաժեշտ էր բարձրացնել Եկեղեցու վարկը, շարունակել և զարգացնել Գրիգոր Լուսավորչի օրոք սրբազնագործված ավանդները: Տրդատ Մեծը ժամանակին քաղաքական մեծ իմաստություն ցուցաբերեց՝ Լուսավորչի տան հեղինակությունն ըստ ամենայնի մեծացնելու, կաթողիկոսական իշխանությունը նրա ժառանգական մենաշնորհը դարձնելու համար: Թագավորի նախաձեռնությամբ Գրիգոր Լուսավորչի որդիները՝ Վրթանեսն ու Արիստակեսը, Կեսարիայից տեղափոխվեցին Ղաթառ: Տրդատ Մեծը նրանց ներկայությունը Ղաթառում համարում էր Ղաթոց Եկեղեցու հիմքերն ամրապնդելու գրավականը: Ուշագրավ է, որ նա այդ գործի կազմակերպումը վստահեց սպարապետ Արտավազդ Մանդակունուն և նրա գլխավորած պատվիրակությանը¹:

Գրիգոր Լուսավորչին իբրև հաջորդ ընտրեց կրտսեր որդուն՝ Արիստակեսին, քանի որ ավագը՝ Վրթանեսը, արդեն հասցրել էր ամուսնանալ, մինչդեռ Արիստակեսը շարունակում էր սրբակենցաղ ու միայնասեր կյանքը: Գրիգորն Արիստակեսի մեջ տեսնում էր իր գործի շարունակողին, քրիստոնեական հավատի նվիրյալին, որին ավելի էր վստահում, քան որևէ այլ Եկեղեցական այրի: Նրա այդ խոհերը լիովին կիսում էր Տրդատ արքան, որի հավանությամբ Գրիգորը եպիսկոպոս ձեռնադրեց Արիստակեսին՝ դարձնելով իր տեղապահը և իրավահաջորդը²: Դրանով իսկ դրվեցին կաթողիկոսական իշխանությունը Լուսավորչի տան ժառանգական մենաշնորհը դարձնելու հիմքերը: Թագավորը դա համարում էր Եկեղեցին ամրապնդելու, պետության կայուն հենարանը դարձնելու առհավատչյան: Միայն դրանից հետո Գրիգորն իր ուսերից թոթափեց քահանայապետի ծանրալուծ գործառնությունը: Նա վաղուց էր, ինչ հեռացել էր որդիներից, ի դեմս որոնց նա այժմ

¹ Ագաթանգեղայ Պատմություն Ղաթոց, աշխ. Գ. Տեր-Մկրտչեանի և Ստ. Կանաեանցի, Տփղիս, 1909, ճիգ, էջ 451:

² Ագաթանգեղոս, ճիգ, էջ 452-453, Մովսես Խորենացու Պատմություն Ղաթոց, աշխ. Մ. Աբեղեանի և Ս. Յարութիւնեանի, Տփղիս, 1913, երկրորդ գիրք, էջ 242:

տեսավ իր գործի շարունակողներին ու հանգիստ խղճով հեռացավ լեռները՝ տրվելով ճգնասուն կյանքի:

Տակավին Գրիգորի հովվապետության վերջին տարիներին Արիստակեսը դրսևորեց իր խորագիտությունը քարոզչական ասպարեզում՝ երբեմն գերազանցելով հորը: Ագաթանգեղոսի վկայությամբ նա «առաւել ևս քան զհայրն վերագոյն երևեցուցանէր զիւր վարդապետութիւնն» և հորից հետո «նստաւ յաթոռ կաթողիկոսութեան Հայոց Մեծաց³»:

Վրթանեսն ու Արիստակեսը, ամենայն հավանականությամբ, Կեսարիայից Հայաստան են տեղափոխվել 312 թ., երբ Հռոմի Մաքսիմիանոս կայսրը պատերազմ սկսեց Հայաստանի դեմ՝ ջանալով այնտեղից արմատախիլ անել քրիստոնեությունը, սակայն նրա զորագնդերը չարաչար պարտություն կրեցին Հայոց զորքերից⁴: Նման իրավիճակում Գրիգոր Լուսավորչի որդիները, հալածանքներից խուսափելու բնական մղումով, պետք է ջանային ապաստան գտնել Հայաստանում, որտեղ քրիստոնեության լույսն էր տարածում իրենց հայրը, որը կարոտակեզ սրտով սպասում էր նրանց գալստյանը: Նա որդիներին անձամբ նամակներ ուղարկեց՝ թախանձելով գալ իր մոտ՝ Հայաստան⁵: Հավանաբար Գրիգորի զուգակից Մարիամը շարունակել է մնալ մենաստանում, որտեղ նա մտել էր տակավին ամուսնու՝ Հայաստան մեկնելուց առաջ⁶: Վարդան Արևելցու հավաստմամբ, Մարիամն Աթանագինես վկայի քույրն էր և մտել էր վանք՝ կրոնավորելու (որդու՝ Վրթանեսի հետ)⁷, թերևս հետևելով եղբոր կուսակենցաղ վարքին: ճգնակյացի կյանքով էր ապրում նաև Մարիամի կրտսեր որդին՝ Արիստակեսը, որի վրա մեծ էր մոր ազդեցությունը:

Հայաստան ժամանելով, Արիստակեսը հոր գլխավորությամբ լծվեց Հայ Առաքելական Եկեղեցու առջև ծառացած հրատապ խնդիրների լուծմանը՝ թեթևացնելով հոր ծանր հոգսերը: 325 թ. կայացավ Նիկիայի առաջին տիեզերաժողովը: Հայոց Եկեղեցին, իբրև անկախ և ինքնուրույն կազմակերպություն, այդ տիեզերաժողովում ներկայացվեց Արիս-

³ Ագաթանգեղոս, ԵԻԴ, էջ 453:

⁴ Եւսեբիոս Կեսարացի, Պատմութիւն Եկեղեցւոյ, Վենետիկ, 1877, էջ 688:

⁵ G. Garitte, Documents pour l'étude du livre d'Agathange, Vaticano, 1946, p. 114.

⁶ Յովհան Մամիկոնեան, Պատմութիւն Տարօնոյ, աշխ. Ա, Աբրահամյանի, Երևան, 1941, էջ 72:

⁷ Հաւաքումն Պատմութեան Վարդանայ Վարդապետի, Վենետիկ, 1862, ԺԷ, էջ 37, ԺԸ, էջ 39:

տակեսի կողմից⁸: Այս փաստն ինքնին վկայում է, որ Տրդատ Մեծն ու Գրիգոր Լուսավորիչն արդեն Արիստակեսին համարում էին հոր հայրապետական Աթոռի ժառանգորդ: Ուստի հիմնագուրկ է այն կարծիքը, որ իբր Գրիգոր Լուսավորչին հաջորդել է ոչ թե Արիստակեսը, այլ Մերուժան եպիսկոպոսը⁹, որը սակայն Հայաստանի եպիսկոպոս է հիշվում Գրիգորից շատ առաջ, 3-րդ դ. կեսերին¹⁰: Հայ մատենագիրները վկայում են, որ Գրիգոր Լուսավորչին հաջորդել է Արիստակեսը, և բնավ չեն հիշում Մերուժանին որպես նրա հաջորդ: Նկատենք, որ Մերուժանին Գրիգոր Լուսավորչից հետո դնելու փաստն ինքնին ժխտում է կաթողիկոսական իշխանությունը Լուսավորչի տոհմի ժառանգական մենաշնորհը դառնալու իրողությունը:

Գրիգոր Լուսավորիչը և Տրդատ թագավորը սպասում էին Արիստակեսի վերադարձին, որը Հայաստան պետք է հասցներ առաջին տիեզերաժողովի կանոնական որոշումները, զինքն Հայ Առաքելական Եկեղեցին նոր խոսքով, բացեր քրիստոնեական կրոնի նոր հորիզոններ: Շուտով վերադարձավ Արիստակեսը և համաշխարհային այդ եկեղեցաժողովի որոշումները ներկայացրեց թագավորին ու Գրիգոր Լուսավորչին¹¹: Արիստակեսը հորը բերեց նաև նրան ձեռնադրող Ղևոնդ մետրոպոլիտի ողջույնը, որին նա հանդիպել էր Կեսարիայում և հետը մեկնել Նիկիա¹²: Արիստակեսը, որը ավելի քան 13 տարի վարել էր եպիսկոպոսի պաշտոնը, ստանձնեց Հայոց կաթողիկոսությունը: Դա վկայված է նաև Մովսես Խորենացու մոտ, ըստ որի Նիկիայի տիեզերաժողովից Արիստակեսի վերադառնալուց հետո Գրիգոր Լուսավորիչն այլևս չերևաց, և կաթողիկոսի իշխանությունը ժառանգեց Արիստակեսը՝ աթոռակալելով յոթ տարի¹³: Ըստ այսմ, վերջինս Հայոց Եկեղեցու Հայրապետ է եղել 325-333 թվականներին: Ուստի մերժելի է Արիստակեսի կաթողիկոսությունը 298-338-ով թվագրելը¹⁴: Բոլորովին հիմնագուրկ է նաև այն կարծիքը, որ իբր Արիստակեսը Գրիգոր

⁸ J. Mansi, Sacrorum conciliorum nova et amplissima collectio, vol. 7, Graz-Austria, 1960, p. 699.

⁹ Ն. Ակինեան, Սուրբ Գրիգոր Լուսավորիչ («Հանդես Ամսօրեայ», 1949, էջ 27): Տե՛ս նաև Դիոնեսիոս Ալեքսանդրացի, Թուղթ վասն ապաշխարութեան առ Մերուժան եպիսկոպոս Հայոց, հրատ. Ն. Ակինեանի («Հանդես Ամսօրեայ», 1949, էջ 66-67):

¹⁰ Եւսեբիոս Կեսարացի, Պատմութիւն Եկեղեցւոյ, էջ 517:

¹¹ Ագաթանգեղոս, ՃԻԷ, էջ 465-466:

¹² Մովսես Խորենացի, II, Դ, էջ 240:

¹³ Նույն տեղում, ՂԱ, էջ 243:

¹⁴ Ն. Ակինեան, Սուրբ Գրիգոր Լուսավորիչ, էջ 27:

Լուսավորչից ավելի վաղ է վախճանվել և վարել է սոսկ կաթողիկոսական փոխանորդի պաշտոնը 320-327 թվականներին¹⁵:

Նիկիայի առաջին տիեզերաժողովին Արիստակեսի մասնակցությունը բնականաբար նրան հայտնի դարձրեց քրիստոնեական աշխարհում, որն ի դեմս նրա տեսավ հոր Աթոռի արժանի ժառանգորդին: Դա չէին կարող անտես առնել նաև Տրդատ թագավորն ու Գրիգոր Լուսավորիչը, որն արդեն ծեր էր, հոգնած ու տկար. անհրաժեշտ էր կաթողիկոսական իշխանությանը նոր լիցք հաղորդել, ամրապնդել Հայ Առաքելական Եկեղեցու հիմքերը: Դա կարևորվում էր ոչ միայն Հայ, այլև քրիստոնեական մյուս Եկեղեցիների համար, որոնք Հայոց Եկեղեցին դիտում էին որպես Արևելքում քրիստոնեական հավատքի զորավոր պատվար:

Արիստակեսը թեև ձեռնադրվեց Կեսարիայում, սակայն դա ուներ միայն ծիսական նշանակություն, քանի որ Հայ Եկեղեցին Հռոմեական կայսրությունից, հետևաբար նաև Կեսարիայի մետրոպոլիտության իրավասությունից դուրս էր, և վերջինս բնականաբար նվիրապետորեն չէր կարող (և նման հավակնություն չունեի) գերիշխել Հայոց Եկեղեցուն: Ավելին, տվյալ պահին, երբ Հռոմեական կայսրությունում տակավին քրիստոնեությունը չէր հռչակվել պետական կրոն, այլ սոսկ հանդուրժվում էր, Կեսարիայի Աթոռն ինքը կարիքն ուներ անկախ Հայաստանի Առաքելական Եկեղեցու զորակցության: Այն փաստը, որ քրիստոնեական աշխարհը տակավին մնում էր միասնական, հաստատուն հող էր ստեղծում Հայոց Եկեղեցու և Կեսարիայի մետրոպոլիտության միջև դավանա-ծիսական միությունը պահպանելու համար: Արևմուտքի քրիստոնեական աշխարհի հետ Հայ Եկեղեցու առնչակցվելու, չմեկուսանալու գրավականն այդպիսով նախ և առաջ Կեսարիայի Աթոռի հետ հաղորդակցության պահպանումն էր:

Հայոց կաթողիկոսական պաշտոնն ստանձնելուց հետո Արիստակեսը շարունակեց քարոզչական գործունեությունը և առանձնակի ուշադրություն դարձրեց Հայոց Եկեղեցու նվիրապետական համակարգի կատարելագործմանը: Այդ նպատակով հարկ էր, որ նա ձեռնադրեր նոր եպիսկոպոսների և հոգևոր այլ պաշտոնյաների: Ենթադրվում է, որ Արիստակեսի հովվապետության ժամանակ Հայաստանի եպիսկոպոս-

¹⁵ Պ. Անանեան, Ս. Գրիգոր Լուսավորչի ձեռնադրության թուականը և պարագաները, «Բազմավեպ», 1960, էջ 107:

ների թիվը հասնում էր վեցի¹⁶: Սակայն այս թիվը նվազեցված է և չի ապացուցվում պատմադրյուրների ընձեռած տվյալներով: Գրիգոր Լուսավորչի օրոք եպիսկոպոսների թիվը 12-ի էր հասնում: Արիստակեսի օրոք նրանց թիվը հարկ է, որ աճեր, քանի որ Հայաստանի տարբեր կողմերում եկեղեցական իշխանությունն իրականացնելու համար անհրաժեշտ էին հոգևոր առաջնորդներ: Դա թելադրվում էր նաև հեթանոսության ահագնացող տարերքի դեմ արդյունավետ պայքար մղելու անհրաժեշտությամբ: Եկեղեցու համար տեղերում հենարան ստեղծելու նպատակադրումով Արիստակեսը հիմնեց նաև վանքեր ու եկեղեցիներ՝ կամենալով քրիստոնեության լուսավետ գաղափարները հասցնել երկրի հեռավոր հորիզոնները:

Արիստակեսը, ինչպես հաղորդում են հայ մատենագիրները, հորից ժառանգեց նաև անողոք պայքարը հեթանոսության դեմ: Այդ պայքարն ուներ ցայտուն արտահայտված քաղաքական հնչեղություն, քանի որ Սասանյան դուռը շարունակում էր օժանդակել Հայաստանի հեթանոսամետ ուժերին, որոնք այդպիսով ավելի էին զորանում՝ դառնալով Հայոց պետության և Եկեղեցու հիմքերը խարխլող զորեղ գործոն: Հարմարադեպ պահի նրանք կարող էին երկրի քաղաքականության սլաքը թեքել դեպի Սասանյանները՝ ջանալով առ ոչնչի հանգեցնել Տրդատ Մեծի, Գրիգոր Լուսավորչի և նրանց հետևորդների ջանքերով Հայաստանում սերմանված քրիստոնեական քաղաքակրթության նվաճումները: Հայոց Եկեղեցու դեմ հեթանոսության պայքարը վտանգավոր ձևեր ընդունեց Սասանյան Շապուհ Բ արքայի (309-379) քրիստոնեահալած քաղաքականության ընթացքում: 6-րդ դարի ասորի մատենագիր Մշիխա Ջեխան վկայում է, որ Շապուհ Բ-ն անագորույն մի հրամանով իր ստորադրյալներից պահանջեց անխնա ոչնչացնել քրիստոնյաներին¹⁷: Հայաստանում հեթանոսության աշխուժացումը պայմանավորված էր նաև նրանով, որ Տրդատ թագավորն արդեն բոլոսել էր իր ութսունամյա տարիքը և, ըստ երևույթին հետևելով Գրիգոր Լուսավորչին, դարձել ճգնակենցաղ՝ մեկուսանալով երկիրն ալեկոծող հոգևոր և քաղաքական խմորումներից: Հեթանոսությունն, անշուշտ, պահը ճիշտ էր ընտրել: Հայաստանում (հատկապես նրա ծայրագավառներում) քրիստոնեությունը դեռևս խոր արմատներ չէր ձգել

¹⁶ J. Markwart, Die Entstehung der armenischen Bistümer, Roma, 1932, S. 197.

¹⁷ Տես Ասորական աղբյուրներ, Ա, առաջաբան, թարգմ. և ծանոթագր.: Հ. Մելքոնյանի, Երևան, 1976, էջ 97:

ժողովրդի ընդերքում, ուստի հեթանոսաբարո խավերը որոշակի հենարան ունեին երկրում և կարող էին հուզել քրիստոնեամերժ տրամադրություններ: Տրդատ թագավորի նկատմամբ հակոտնյա դիրքորոշումը գնալով ավելի էր ուժեղանում այդ խավերում, որոնց աչքին Տրդատ Մեծն անձնավորում էր քրիստոնեության հաղթանակը: Ուստի նրանք, փարվելով նախնյաց հավատքը վերականգնելու հույսին, դավեր նյութեցին թագավորի ու կաթողիկոսի դեմ: Մոլեկրոն հեթանոսների վերածնվող այդ հույսի զոհը դարձավ նաև Արիստակեսը, որի հանդեպ, ինչպես հավաստում է Մովսես Խորենացին, սուր թշնամանք էին տածում «անիրաւ ու աղտեղագործ» մարդիկ: Վերջիններիս չարագույժ մտահղացման գործադրողը եղավ Ծովքի Արքեղայոս իշխանը, որի անունը հուշում է, որ նա տարազգի, ըստ երևույթին՝ «հունախառն էր»¹⁸: Արիստակեսը Ծովքում կառուցել էր հոյաշեն եկեղեցի, որտեղ հաճախակի այցելություններ էր կատարում և, չհանդուրժելով Արքեղայոսի հեթանոսաբարո արարքները, հորդորում, անգամ դատափետում էր նրան: Որպես Հայոց Հովվապետ, Արիստակեսը պետք է սանձեր հայրենիքի, Հայոց պետության ու եկեղեցու հանդեպ այդ նախարարի ոճրաշավիղ մղումները: Սակայն Հայրապետի ողջախոհության կոչերը մնացին անարդյունք: Ավելին, չհանդուրժելով Արիստակեսի հանդիմանությունները, Արքեղայոսը սրախողխող արեց նրան և, հատուցումից խուսափելու համար, ճողոպրեց Կիլիկիա¹⁹ (որը թերևս նրա հայրենիքն էր): Այդպիսով մի արյունոտ էջ ևս գրվեց Հայոց եկեղեցու պատմության մեջ: Փալստոս Բուզանդը Արիստակեսի եղերական մահը համարում է մարտիրոսական («խոստովանական»)²⁰ անշուշտ նկատի առնելով քրիստոնեական հավատի համար հեթանոսների ձեռքով նրա նահատակվելու փաստը:

Սակայն հեթանոսությունը չէր նահանջում և մահաշունչ կոչերով նոր զոհեր էր պահանջում: Վրիժաժարավ այդ կոչերը բնակչության որոշ մասի մեջ գտան իրենց մահագույժ արձագանքները: Հեթանոսները բացորոշ կերպով մարտահրավերներ էին նետում Հայոց եկեղեցուն, հոգևոր դասին, հավատացյալ ժողովրդին: Անհրաժեշտ էր մարել հոգևոր հրդեհը: Այդ ուղղությամբ հետևողական ու անհաշտ պայքար ծավալեց Գրիգոր Լուսավորչի անդրանիկ որդին՝ Վրթանեսը, որը

¹⁸ Ղ. Ալիշան, Յուշիկք հայրենեաց Հայոց, Ա, Վենետիկ, 1869, էջ 370:

¹⁹ Մովսես Խորենացի, II, ՂԱ, էջ 243-244:

²⁰ Փալստոս Բուզանդ, III, Բ, էջ 6:

եղբորից հետո ժառանգեց կաթողիկոսական գահը: Տակավին Գրիգոր Լուսավորիչը նրան մղեց հոգևոր զբաղմունքի, հավանաբար նաև ձեռնադրեց եպիսկոպոս, որով իսկ ի դերև հանվեց ձեռնադրվելու նպատակով Կեսարիա Վրթանեսի մեկնելու անհրաժեշտությունը: Այդ փաստը վկայում է Կեսարիայի մետրոպոլիտական Աթոռից Հայ Առաքելական Եկեղեցու կախվածության բացակայության մասին: Ամենայն հավանականությամբ Վրթանեսը հոր կողմից ձեռնադրվել է 325 թ., Նիկիայի առաջին տիեզերաժողովի հրավիրման տարում, որպեսզի համաշխարհային այդ եկեղեցաժողովում Հայոց Եկեղեցին ներկայացվի իբրև տեղում ձեռնադրվող եպիսկոպոսներ ունեցող նվիրապետական համակարգ, ինքնուրույն հոգևոր հաստատություն և այդ կերպ ավելի մեծացվի նրա հեղինակությունը քրիստոնեական աշխարհում, օրինապատշաճ համարվի Հայաստանում Եկեղեցու հոգևոր առաջնորդներ ձեռնադրելու կարգը և կաթողիկոսական գահի ժառանգականությունը: Ըստ Մովսես Խորենացու, Վրթանեսը եպիսկոպոսության պաշտոնը վարել է 15 տարի և վախճանվել Հայոց թագավոր Տիրանի գահակալության երրորդ տարում²¹, ինչպես 340 թվականին: Ինչպես տեսնում ենք, այս վկայությամբ հավաստվում է 325 թ. նրա ձեռնադրվելու փաստը:

Գրիգոր Լուսավորչի կողմից որդիների ձեռնադրումը հետամտում էր ոչ միայն իր տան հոգևոր հարստության (դինաստիայի) օրինականացման, այլև երկրի պետա-իրավական ոլորտներում Հայոց Եկեղեցու առաջնորդի հեղինակությունը մեծացնելու նպատակներ: Այդպիսով կաթողիկոսական իշխանությունը, ի զուգակշիռ թագավորականի, օժտվում էր պետական իշխանությանը բնորոշ ժառանգական, հարստենիկ վում էր պետական իշխանությանը բնորոշ ժառանգական, հարստենիկ (դինաստիական) հատկանիշներով: Հայ մատենագիրների մոտ Հայ Եկեղեցու առաջնորդի իշխանությունը ներառում է ոչ միայն հոգևոր-եկեղեցական, այլև դատական ու քաղաքական (դիվանագիտական) գործառնություններ: Ըստ այդմ կաթողիկոսի իշխանության կարևոր հատկանիշը նրա պետա-իրավական գերակայության փաստն էր: Նման իրավագործությունն էականորեն ամրապնդում էր Եկեղեցու հիմքերը՝ հաստատուն կռվաններ ստեղծելով հեթանոսության դեմ արդյունավետ ու կազմակերպված պայքարի համար: Վրթանեսի հովվապետության ու կազմակերպված պայքարի համար: Վրթանեսի հովվապետության ընթացքում (333-341) այդ պայքարը չմարեց, այլ շարունակվեց

²¹ Մովսես Խորենացի, III, ԺԱ, էջ 269:

նորանոր բռնկումներով, որոնք ապացույց էին այդ չարագոր երևույթի խորն արմատների մասին: Հեթանոսությունը չէր նահանջում կաթողիկոսի եռանդուն ջանքերի, նրա հիրավի ստեղծագործ կորովի առջև, նույնիսկ մարտահրավեր էր նետում նրան: Եթե Տրդատ թագավորը հարաժամյա հովանավորությամբ սատարում էր հեթանոսության դեմ Եկեղեցու պայքարին, ապա նրան հաջորդած Խոսրով Դ Կոտակն ու Տիրանը չունեին իրենց նախորդի պետական ու հոգևոր ավյունը: Նրանց օրոք հեթանոսական տարերքը նոր ուժով զգալ տվեց իրեն՝ սպառնալով պետությանն ու Եկեղեցուն, ալեկոծելով երկրի բոլոր հորիզոնները: Մովսես Խորենացին հաղորդում է, որ հայրենասեր ուժերը համախմբվեցին Վրթանեսի շուրջը և Հաշտյանքի ու Ծոփքի մյուս գավառների իշխաններին առաքեցին Հռոմի Կոստանդ կայսեր մոտ, որպեսզի նրա համաձայնությամբ Հայաստանում թագավորեցնեն Խոսրով Դ Կոտակին²²: Կայսրը Վրթանեսին հղած պատասխան թղթով իրազեկեց, որ Հայաստան է ուղարկել օգնական զորք և հրաման՝ Խոսրով Կոտակին թագավոր կարգելու վերաբերյալ²³:

Վրթանես Կաթողիկոսը նպատակասլաց ջանքերով շարունակեց ժողովրդի մեջ վառել հեթանոսության չարագույժ հորձանքի դեմ պայքարի հուրը: Նա հաճախակի քարոզչական առաքելություններ էր կատարում Հայաստանի տարբեր գավառներ: Վրթանեսի Գրիգորիս որդին Փայտակարանի իշխանների խնդրանքով մեկնեց Աղվանից աշխարհ՝ քրիստոնեություն տարածելու, սակայն եղերամահ արվեց մոլեկրոն հեթանոսների՝ մասքթաց ցեղերի կողմից²⁴: Մովսես Կաղանկատվացին հաղորդում է, որ Գրիգորիսը քարոզչական առաքելություն է կատարել ոչ միայն Աղվանքում, այլև Վրաց աշխարհում²⁵: Բայց Գրիգորիսը Վրաստանում չի քարոզել: Պատմագիրն օգտվել է Փավստոս Բուզանդից, որը թեև նշում է, թե Գրիգորիսը եղել է Աղվանից և Վրաց կողմերի եպիսկոպոս, բայց ավելացնում է նաև, որ վերջին-

²² Նույն տեղում, III, Ե, էջ 260-261:

²³ Նույն տեղում, III, Ե, էջ 261:

²⁴ Մովսես Խորենացին Գրիգորիսի նահատակությունը դնում է Տրդատ Մեծի ժամանակ (տե՛ս Մովսես Խորենացի, III, Գ, էջ 259): Սակայն Գրիգորիսը նահատակվել է Խոսրով Կոտակի օրոք՝ 335 թ.:

²⁵ Մովսես Կաղանկատուացի, Պատմութիւն Աղուանից աշխարհի, աշխ. Վ. Առաքելյանի, Երևան, 1983, I, ԺԴ, էջ 36-37:

ներիս տակ նկատի ունի սոսկ Մասքթաց Արշակունիների թագավորությունը,²⁶ որն, ինչպես հայտնի է, ընդգրկում էր միայն Աղվանքը:

Գրիգորիսի նահատակությունը նոր լիցք հաղորդեց հեթանոսությանը: Մասքութները չսահմանափակվեցին միայն դրանով: Իրանական այդ ցեղերը, խրախուսվելով Պարսից տիրակալի կողմից, իրենց թագավոր Սանեսան Արշակունու գլխավորությամբ հարձակվեցին Հայաստանի վրա: Այդ արշավանքը կատարվեց Գրիգորիսի նահատակության տարում²⁷: Անշուշտ, մասքութները միայն իրենց զորութով չէին համարձակվի պատերազմել Հայաստանի դեմ: Սանեսանը,- գրում է Խորենացին,- Գրիգորիսին սպանել տալուց հետո մտահոլացավ գրավել Հայաստանը՝ «զօրութեամբ օտար ազգաց»²⁸, որոնց հավանորեն Շապուհ Բ-ն էր հրահրել: Դա հստակվում է պատմիչի հետագա շարադրանքում, ուր ասվում է, որ մասքութները Հայաստան արշավեցին Շապուհ Բ-ի գաղտնի հրամանով²⁹: Վերջինս, ինչպես հայտնի է, շարունակում էր անլուր դաժանությունները քրիստոնյաների նկատմամբ³⁰:

Սասանյան արքայի օժանդակությամբ զորացած մասքութները կարողացան գրավել Հայաստանի զգալի մասը, այդ թվում նաև՝ Վաղարշապատը, շահատակելով նաև կաթողիկոսարանը: Մի պահ հեթանոսությունը Հայստանում վերասլացք ապրեց: Մասքութներին պատշաճ դիմադրություն ցույց չտրվեց, քանի որ Վաչե Մամիկոնյանը՝ Հայոց զորքի սպարապետը, մեկնել էր Հռոմեական կայսրություն: Խոսքով Դ արքան ստիպված հեռացավ Դարույնք ամրոց և Վրթանեսի հետ ամրացավ այնտեղ: Գրեթե մեկ տարի Հայաստանը, նրա եկեղեցիները ենթարկվեցին դժնաբարք հրոսակների շահատակությանը: Այդ դաժան ժամանակամիջոցում քրիստոնեական կենարար իր թևերն արժվի պես պահում էր Հայոց աշխարհի վրա, որի շնորհիվ ժողովուրդը չընկրկեց անսքող այդ վայրագությունների առջև:

²⁶ Փավստոս Բուզանդ, III, Ե, էջ 10:

²⁷ J. Markwart, Die Entstehung der armenischen Bistümer, S.214.

²⁸ Մովսես Խորենացի, III, 9, էջ 260:

²⁹ Նույն տեղում, III, Թ, էջ 266:

³⁰ Հմմտ. G. Wiessner, Zur Martyrüberlieferung aus der christenverfolgung Schapurs II Gottingen, 1967, S. 157-158.

336 թ. վերադարձավ Վաչե սպարապետը և փայլուն հաղթանակ տարավ թշնամու դեմ³¹:

Հեթանոսության դեմ ընթացող պայքարի պայմաններում Հայաստանն ալեկոծվեց նաև միջիշխանական ընդհարումների պատճառով: Երկրի միասնությունը խաթարող այդ բախումները մարելու համար որոշակի ճիգեր գործադրեց Վրթանես Կաթողիկոսը: Խոսքով Դ թագավորը Վրթանեսի հետ (որի ազդեցությունն զգալի էր նրա վրա) զորավոր միջոցների դիմեցին երկրի երկու գավառատեր նախարարների՝ Մանավազյանների և Որդունիների միջև փոխադարձ բնաջնջման արյունոտ ընդհարումներին վերջ տալու համար: «Մեծ եպիսկոպոսապետն Վրթանես», գրում է պատմագիրը, թագավորի հետ միասին Աղբիանոս եպիսկոպոսին ուղարկեցին այդ իշխանների մոտ՝ նրանց հաշտեցնելու առաքելությամբ: Հավանաբար նրանք նկատի առան այն հանգամանքը, որ Աղբիանոսը հողատիրույթներ ուներ Հարք գավառում³², որը համարվում էր Մանավազյանների հայրենակալվածքը: Սակայն Աղբիանոսին չհաջողվեց հաշտեցնել կռվազան նախարարներին, որոնք անարգալից խոսքերով պարսավեցին նրան ու շարունակեցին բնաջնջել միմյանց³³:

Նշված նախարարների միջև ծայր առած ընդհարումներն ամենայն հավանականությամբ նույապես հրահրված էին Շապուհ Բ-ի կողմից, որը կամենում էր այդպիսով Հայաստանում ստեղծել խառնաշփոթ իրավիճակ, հեղինակազրկել Հայոց Արշակունի թագավորին և առաջ մղել իր կողմնակից հեթանոսաբարո հայ նախարարներին: Այդ ընդհարումներն արգասիք էին խոսքով Կոտակի թագավորական իշխանության թուլության³⁴ անշուշտ, նաև էականորեն պայմանավորեցին այն: Ստեղծված պայմաններում հատկապես կարևորվում էր Եկեղեցու և Կաթողիկոսի խաղացած դերը երկրի պետական-քաղաքական հարաբերություններում: Ընդամին Շապուհ Բ-ի վարած քաղաքականության սուր սլաքն ուղղված էր նաև Հայոց Եկեղեցու դեմ:

Սասանյան բռնակալը հետևողականորեն շարունակում էր դավադիր ձեռնարկումները Հայաստանի դեմ: Նրա հրահրմամբ 337 թ. Աղձնիքի բդեշխ Բակուրն ապստամբեց խոսքով Դ արքայի դեմ:

³¹ Փավստոս Բուզանդ, III, է, էջ 14-15:

³² Նույն տեղում, V, ԻԹ, էջ 190, VI, Բ, էջ 223:

³³ Նույն տեղում, III, Դ, էջ 9:

³⁴ Հ. Մանանդյան, Երկեր, Բ, Երևան, 1978, էջ 145:

ժեշտ է հիշել հայրենիքի պաշտպանության զոհասեղանին իրենց կյանքը նվիրաբերած հայ մարտիկների անունները³⁶:

Հայոց զորքի մարտունակությունը բարձրացնելու նպատակ էր հետապնդում նաև Վրթանեսի միջամտությունը՝ Պարսից զորքերի դեմ 338 թ. մղված մարտում զոհված Վաչե Մամիկոնյանի դեռահաս որդուն՝ Արտավազդին, հոր պատիվն ու բարձր շնորհելու համար: Ըստ Փավստոս Բուզանդի, «հրաման ետուն մեծ եպիսկոպոսապետն Վրթանես հանդերձ թագաւորաւն», որպեսզի Արտավազդը «կացցէ ի տեղի նախնեացն իւրոց և հօր իւրոյ»³⁷:

Վրթանեսի գործունեությամբ աճեց Հայոց Եկեղեցու հեղինակությունը քրիստոնեական աշխարհում՝ շնորհիվ հեթանոսության դեմ նրա հետևողական ու անզիջում դիրքորոշման: Հայ Եկեղեցին ինքնուրույն կերպով լուծում էր իր ներքին ծիսական ու պաշտամունքային խնդիրները: Հատկանշական փաստ է, որ այդ բնագավառում կանոնական բարեկարգություններ ձեռնարկելիս Վրթանեսը բնավ չապավինեց Կեսարիայի մետրոպոլիտի խորհուրդներին, այլ գերադասեց դիմել Երուսաղեմի Պատրիարք Մակար Ա-ին, որը հարգալիր պատասխանով արձագանքեց Հայոց Կաթողիկոսին՝ նրան ուղարկելով նաև Եկեղեցու ծիսակարգի վերաբերյալ ինը կանոններ³⁸: Անշուշտ հիմնավորված չէ այն կարծիքը, որ նշված կանոնները Հայաստան է ուղարկել ոչ թե Մակար Ա-ը, այլ Երուսաղեմի Մակար Բ Պատրիարքը, և այն էլ ոչ թե Վրթանես Կաթողիկոսին, այլ Սյունիքի Վրթանես եպիսկոպոսին, որը գահակալել է շատ ավելի ուշ՝ Զ դարում³⁹: Ժամանակին այս տեսակետը իրավացի կերպով վիճարկվեց⁴⁰:

Նկատենք, որ խնդրահարույց կանոնները կրում են «Կանոնք Մակարայ առաջնոյ» վերտառությունը և հղված են «առ քրիստոսասէր և երկիւղած եպիսկոպոսապետդ Վրթանես և առ համաւրէն եպիսկոպոսս և քահանայս Հայոց»⁴¹: Դժվար չէ հետևեցնել, որ կանոններն ուղարկվել են Հայաստանի բոլոր հոգևորականներին ու նրանց

³⁶ Նույն տեղում, III, ԺԱ, էջ 24:

³⁷ Տե՛ս նույն տեղում, էջ 24-25:

³⁸ Գիրք թղթոց, Թիֆլիս, 1901, էջ 407-412:

³⁹ Ն. Ակինեան, Թուղթ Մակարայ Բ Երուսաղեմի հայրապետի առ Վրթանես եպիսկոպոսապետ Սիւնեաց յաղագս կարգաց եկեղեցւոյ, Վիեննա, 1930, էջ 22-25:

⁴⁰ Տե՛ս Վ. Հացունի, Առ Վրթանես թղթին հեղինակը Մակար Առաջինն է, ոչ Երկրորդը, «Բազմավեպ», 1931, էջ 70-71:

⁴¹ Կանոնագիրք Հայոց, Բ, աշխ. Վ. Հակոբյանի, Երևան, 1971, էջ 219-221:

ընթացումները և դրանցից բխող ծիսական խոչընդոտները: Ասվածին հարկ է ավելացնել նաև, որ Մակար Ա-ն պատասխան թղթում բնավ չէր արժարժում Հայ Եկեղեցու ինքնագոյ հիմքերը շոշափող խնդիրներ, քանի որ Երուսաղեմի Աթոռը նվիրապետորեն գերակայություն չուներ Հայոց Եկեղեցու նկատմամբ և հիմնվել էր ավելի ուշ՝ 325 թ. Նիկիայի տիեզերաժողովի որոշմամբ:

Վրթանեսը հեթանոսության դեմ հետևողական պայքարը շարունակեց նաև Խոսրով Կոտակի հաջորդ Տիրան թագավորի օրոք՝ լայն գործունեություն ծավալելով նաև պետական-դիվանագիտական ասպարեզում: Ըստ Մովսես Խորենացու, Խոսրով Կոտակի մահից հետո Վրթանեսը գումարել է Հայոց ավագ նախարարների, զորապետների ժողով, որտեղ որոշվել է Հայաստանի ժամանակավոր կառավարիչ նշանակել Արշավիր Կամսարականին: Այնուհետև Կաթողիկոսը Տիրանին տարել է հռոմեական կայսր Կոստանդինոսի մոտ և կարգել տվել Հայոց թագավոր⁴⁴:

Վրթանեսի կենդանության ժամանակ Տիրանը դրսևորեց հռոմեամետ ուղեգիծ, որը թերևս արդյունք էր նաև թագավորի վրա նրա ունեցած ազդեցության: Կաթողիկոսը, ելնելով Հայաստանում խմորված կացությունից, ջանում էր երկրի արտաքին քաղաքական սլաքն ուղղել դեպի Արևմուտք՝ Հռոմեական կայսրություն, հավատակից այն երկիրը, որի օգնությամբ նա հույս էր ականկալում ետ վանել Սասանյանների կողմից հովանավորվող զրադաշտության օրավուր աճող չարագույժ հորձանքը, որը հղի էր քաղաքական վտանգավոր հետևանքներով՝ Հայոց թագավորության և բուն իսկ Եկեղեցու հետագա գոյության համար: Սակայն Տիրան թագավորը (թերևս հեթանոսամետ հայ նախարարների ազդեցությամբ) հակվեց հեթանոսության կողմը, թեև, ինչպես հավաստում է պատմագիրը, նրա այդ վարքագիծը դեռևս բացորոշ դրսևորումներ չուներ, քանի որ Տիրանը երկյուղում էր «ի մեծէն Վրթանիսէ»⁴⁵: Հայոց Հայրապետի շուրջ պարուրված ոճրաբույր մթնոլորտում նրա դեմ դավ նյութեց: Ավանդական պատմությունը հավաստում է, որ Սիմլեռան հեթանոսաբարո բնակիչներն էին Վրթանեսի դեմ դավադրության կազմակերպողները: Կաթողիկոսը միշտ հանդիմանել էր նրանց մոլորաշավիղ վարքի, «չարադետ արարքների համար»⁴⁶: Փավստոս

⁴⁴ Մովսես Խորենացի, III, Ժ, էջ 268:

⁴⁵ Նույն տեղում, III, ԺԱ, էջ 269:

⁴⁶ Տե՛ս Մովսես Հայկականք, Ժ, Վեներտիկ, 1854, էջ 52:

Բուզանդի վկայությամբ, Վրթանեսի դեմ ուղղված դավին մասնակից էր նաև Հայոց թագուհին, որի հրամանով էին գործում դավադիրները: Նրանք իրենց դժխեմ մտահղացումը փորձեցին իրագործել դեպի Հայաստան Շապուհ Բ-ի կատարած արշավանքի ժամանակ, երբ Վրթանեսը Պատարագ էր մատուցում Աշտիշատի եկեղեցում: Սակայն դավադրությունն ի դերև հանվեց. ապա կաթողիկոսը ժամանեց Հայոց զորքի մեջ ու իր հայրենաշունչ քարոզներով ոգեպնդեց նրան⁴⁷:

Անշուշտ դավադրության ձախողումը վկայում է, որ Վրթանեսը լայն հենարան ուներ ժողովրդի մեջ և բնավ էլ դյուրին որս չէր դիցանում ամբոխի ու նրան սատար կանգնողների համար:

Արիստակեսի ու Վրթանեսի օրոք Հայ Առաքելական Եկեղեցին, չնայած կրոնական ու քաղաքական ալեհույզ կացությանը, ավելի ամրապնդեց իր հիմքերը: Փոթորկաշունչ իրավիճակը կոփեց նրան, փորձությունների բովում բյուրեղացավ Հայոց առաքելադրոշմ հավատքը, որպես բնական արգասիք Լուսավորչի փառասուն զավակների՝ ազգի հոգևոր կորովը մարմնավորող ուխտանվեր այրերի բեղուն գործունեության: Նրանց ցանած սերմերը հետագայում ևս տվեցին իրենց կենսունակ ծիլերը: Վրթանեսի որդին՝ Հուսիկ Կաթողիկոսը, և Լուսավորչի տան մյուս ներկայացուցիչները ցկյանս հավատարիմ մնացին այդ կոչմանը՝ քրիստոնեական հավատի երկնասփյուռ լույսը վառ պահելով Հայոց լեռնաշխարհում:

⁴⁷ Փավստոս Բուզանդ, III, 9, էջ 7, ԺԱ, էջ 23: